

玄覽堂叢書

第六十五冊

五

五

五

五

五

五

五

五

五

五

五

五

五

舊京詞



舊京詞



明周公始書成公既自序又索

余言冠之首簡余惟舊京廼

高皇定鼎之地當時投戈講藝惟

是二三耆碩承顧問而參謀議

都俞賡歌千載僅見一時

詞林志
序
乙
朝廷典冊百司章奏必錄副藏之
詞林即載籍所儲等之四庫何
其盛耶去今二百三十年所載
籍散亡略盡惟

國初案牘猶有存者嘉靖中呂中
石先生視篆嘗撫輯成書共若
千卷藏于家今楊奉常止菴與

呂同邑云親見其一二冊未及
流布而突于火惜哉相傳舊案
牘凡四大匱余在事時僅見其
一蓋呂公所遺中又多朽腐然
先朝故事尚有一二炳然塵蠹
間猶可據以駁

國史野乘之譌而補其漏逸余每

欲翻匱中所有參以聞見勒成一書備衙門故實竟以懶失之無何周公來而余忝南司成時參議論因及前事公慨然任之半歲而書成首紀事次紀典又次紀官凡建置之顛末官品之沿革職掌之鉅細登籲之廣狹

委任之重輕遷轉之久速無不
犁然畢具而遷都已前尤為詳
贍余因此歎服公任事之勇而
編摩之精也翰林職親地近世
人艷慕以為神仙至南掌院無
朝叅侍從之勞兼山水文酒之
樂又仙中之尊且逸者居之者

或以養望或以藏拙余甚媿焉
乃公則人與地兩無負而此志
一出又足以明其留神故實且
不虛歲月有足多者萬一呂書
無恙再出而稱漢璧則詞林典
故當益詳備非大快歟今正史
開局數年未見歸宿且借公如

掾而速就之則此志又何足為
公多也哉

萬曆丁酉夏至齋宿日南京國
子監祭酒秀水馮夢禎謹序



舊京詞林志自序

昔我

高皇以虎臣定天下至於立綱陳
紀恢皇王之化條則亦惟是文
學者碩之英是詔是度暨乎

文皇委重滋甚心膺之寄非是不
畀焉所謂以武克以文寧者也

是以我朝一代之治颯颯雍雍
有漢之質無漢之陋有唐之文
無唐之靡疇其贊之斯亦儒彥
之效也已舊京翰苑固文獻之
所稽也廼今去之二百有三十
年其間建置沿革之規十不存
七職司故實之紀十不存五姓

氏爵里始末之牒十不存三若
是令後世胡以徵也蓋聞嘉靖
中永豐呂公雅意載籍之事於
時故牘無恙其多可幾五車呂
公簡而輯之為帙二十歸而有
祝融之厄燬焉於是蓬山之遺
湮幾盡矣不佞視篆之歲出餘

言林志序
牘而緇之徃徃猶見先朝遺事
於殘楮斷文之內已乃叅之國
史索之野乘爰成此書存諸藏
室庶幾

聖主右文之規名公鉅卿華國之
業猶得有所考鏡垂之無窮此
史氏之職也小子何敢讓焉二

司成秀水馮公晉江黃公見之
遂命載書於木簡曰毋使異日
者之再湮也夫嗚呼文獻足則
吾能徵之矣書凡紀事者二紀
典者二紀官者二合之曰舊京
詞林志詞林者故禁中所牘名
也

萬曆二十有五年二月朔右春
坊右諭德署掌南京翰林院事
周應賓題

舊京詞林志凡例

一本院自永樂十八年以前未分南北故雖事在行在猶得系之十九年以後止載南院凡涉北院者槩不書

一永樂時解黃而下七人雖在內閣猶爲院官且有掌院事者故凡賚予顧問之類仍皆書之

一紀事所載在洪武中者多得之故牘在永樂中者故牘與實錄參半其有出自野史者止分注於下以備考證而已至如實錄雖稱信史然與故牘牴牾者亦多有之蓋由一時紀述之誤吾

不敢舍故牘而從實錄也

一紀典所載得之故牘者十七得之廖學士詞林記者十二得之諸家史集者十一然而國初典章遺佚者盖多矣

一職官姓名一以故牘爲據惟洪武二年四五年七八九十年建文二年十月以後故牘多缺故自待制講讀而下頗有佚焉間或襍見他書而確有可據者則亦收之仍註其下云見某書若其漫無可據者載諸闕疑以備參攷

一洪武乙丑而後凡進士及第者皆官翰林是編

雖不列及第而紀事紀官中固已具之矣蓋及第姓名之可疑者惟乙丑甲戌二科今乙丑故牘始末明甚甲戌三人姓名具在而景戴先後稍有未明諸家皆以戴居景後故仍之南雍題名牌以戴列第二而無景名蓋戴公宗人祭酒洵所補也

一實錄所載庶吉士姓名寔有未備者今依故牘悉補之

一凡誥勅之文惟出御製者書之其餘則否他若牌記詩章悉不錄惟一二有關於典故者分

書之

一國初諸公有一人而兩姓如許修撰景編修者
一人而兩名如詹學士練修撰者又有人本一
而世所傳姓名互異如王時之或爲王大中范
常之或爲范權劉仲質之或爲邵質者各本二
而世不傳如吳沉之嘗爲吳信仲解縉之常爲
解薦者皆依故牘書之觀者不可無辨

四明周應賓纂

舊京詞林志卷一

紀事上

丁未吳元年八月建翰林國史院以陶安爲學士潘庭堅爲侍講學士范常爲直學士○九月以詹同文爲待制○學士陶安等以

四廟謚號定擬奏請并以史記謚法歷代追尊典故進呈

上留覽越十日旨未下安等以爲請

上曰謚法不必拘

高祖可尊爲玄皇帝

父可尊爲淳皇帝

曾祖與祖以敦晦朴厚等字尊之爾等其再議以聞

翌日安等奏擬

高祖爲玄皇帝廟號德祖

曾祖爲恒皇帝廟號懿祖

祖爲裕皇帝廟號熙祖

父爲淳皇帝廟號仁祖妣爲玄恒裕淳皇后

上從其奏安等乃撰帝后冊文八道以進其後復命

共爲文一道而前所撰八道者寘之○陶安等

復奏

皇后 皇太子冊寶事

上曰冊毋用玉與寶皆以金爲之更堅且久也冊文務在簡古加以訓飭之訓翌日

上召安入內以 御筆文藁二通與安曰爾其體吾此意爲之旣而安等以冊文進

上可之復曰古人用竹簡爲冊以此後世用玉倣之今但以金二片合成一冊不須作玉簡蓋申前命也○以林公慶爲典簿朱夢炎爲修撰鮑頰爲編修○十月定本院官制正官學士秩正三品侍講學士正四品直學士正五品首領官典

簿從五品屬官待制從五品修撰正七品編修
正八品○十一月侍講學士潘庭堅乞辭職學
士陶安等以聞

上曰名爵非強人者既辭其聽之○修撰朱夢炎坐
事改浙江按察司經歷○以朱升為侍講學士
陳桎為修撰○以朱升年老免朝謁○先是命
選道童為雅樂生至是始集

上御戟門召學士朱升及范常實錄作范權率之入見設

上曰雅樂閱視之

上親拊磬命升辨五音升不能審以宮音為徵音

上怒詰責之曰升自謂審音今乃不辨宮徵何也起
居注熊鼎稽首前解曰八音之中石最難和唐
虞唯后夔爲能和此故曰於予擊石拊石百獸
率舞

上曰卽如是任豎儒治樂樂何由和鼎曰樂之和由
人所致君心和則天地之氣和而樂和矣

上爲霽威升旣出謝鼎曰微君吾幾殆

實錄載在七月按是時升

等尚未爲學士故載於此

戊申洪武元年三月命侍講學士朱升等纂脩女戒○

四月以學士陶安爲江西行省參政

上謂安曰朕渡江之初卿首率父老見于軍門爲朕
敷陳王業論當時之務深合朕心由是朝夕相
近幕府軍旅之事裨益良多繼入翰林益聞讜
論今調汪廣洋爲山東叅政而江西上游都會
可以代之者亦莫如卿其爲我撫治之安對曰
臣以微陋叨蒙甄錄俾居左右幸望過矣今復
委以重任恐付託不效負上恩

上曰躬擐甲冑決勝負於兩陣之間此武夫之事非
儒生所能至若承流宣化綏輯一方之衆此儒
者之事非武夫所長也朕之用人用其所能不

強其所不能卿才宜膺是任故以授卿我豈私
卿一人而不愛一方乎安乃頓首受命○八月
陞待制詹同文爲直學士賜名同○九月待講
學士朱升給假還鄉○遣直學士詹同往浙西
訪求人材○前學士陶安卒於江西

上甚悼之親爲文遣使以祭○十二月侍講學士朱
升復任

己酉洪武二年正月更定官制設學士承旨位學士之
上秩正三品學士從三品侍講學士正四品侍
讀學士從四品直學士正五品典簿正七品侍

制從五品修撰正六品應奉正七品編修正八品典籍正八品○陞侍講學士朱升爲學士直學士詹同爲侍講學士修撰陳樞爲直學士○元故學士危素王時張以寧等至京師詔以新製衣冠賜之命素時爲侍講學士以寧爲侍讀學士○二月以袁裕伯爲待制初元亂裕伯避地上海張士誠遣人招之拒不納吳元年上命中書省檄下松江起之裕伯對使者曰受元祿二十餘年背之不忠也母喪未終亡哀而出不孝也乃上書中書省固辭洪武元年復檄起之

稱疾不出

上乃手書諭之曰海濱之民好鬪裕伯智謀之士而居此地苟堅守不起恐有後悔裕伯乃拜書入朝命爲侍講學士辭至是以爲待制○以袁渙睢稼爲應奉○三月

上諭侍讀學士詹同曰古人爲文章或以明道德或以通當世之務典謨之言明白易知無深怪險僻之語至如諸葛亮出師表亦何嘗雕琢爲文而誠意溢出使人讀之自然忠義感激近世文士不究道德之本不務當世之務立辭雖艱深

而意實淺近卽使過于司馬相如揚雄何裨實
用自今翰林爲文但取通道理明世務者無事
浮藻○五月學士朱升以年老乞致仕許之○
六月以宋濂爲學士王禕爲待制○遣侍讀學
士張以寧典簿牛諒使安南封陳日燿爲安南
國王○十月命翰林院所撰誥詞皆撰成定格
首尾通用其詞以正大簡當爲尚毋靡○十一
月

上御外朝召學士宋濂危素詹同等飲親御翰墨賦
冬日詩諸臣皆和焉○陞應奉雒稼爲中書省

叅政○十二月以安南占城交侵遣編修羅復仁偕兵部主事張復往諭之

庚戌

洪武三年二月以王傑爲修撰○四月復以危素

爲侍讀學士初素以失朝免至是復之○改侍

讀學士危素王時爲弘文館學士

實錄有王大甲卽時也

○安南國王陳日燿卒遣編修王廉往祭之○

五月遣編修蔡玄等訪歷代帝王陵寢○六月

編修羅復仁還自安南安南所饋黃金寶貝等

物悉却之不受

上曰不受其饋是也適安南使者至命加賜其使而

舊唐書卷一
還○陞羅復仁爲弘文館學士○七月以唐肅
爲應奉○

上召國子學學正蘇伯衡見於奉天門命爲編修辭
疾不拜遂乞歸許之○修元史成先是洪武元
年十二月

上命丞相選秀才二三十人未嘗仕元者編修元史
遂令翰林委官同禮部官專一提調開局於天
界寺以左丞相李善長爲監修前起居注宋濂
漳州府通判王禕爲總裁徵儒士汪克寬等十
六人纂修取元經世大典以爲考據至二年七

月史將成復命儒士歐陽佑等十二人往北平
采訪元統以後事蹟三年二月仍命學士宋濂
待制王禕爲總裁儒士趙壘等十四人纂修至
是書成通前二百一十三卷宋濂率諸儒以進
詔刊行之賜白金二十兩文綺帛各二疋授儒
士張宣等官唯趙壘朱右朱廉乞還田里從之
○以張宣高啓謝徽葛誠雷燧爲編修○學士
宋濂待制王禕失朝俱降爲編修○以魏觀爲
侍讀學士○陞應奉陶凱爲禮部尚書○八月
以申屠衡爲修撰衡被命草檄喻蜀稱旨故有

是命○十一月懸本院榜額曰詞林○十二月
陞侍讀學士魏觀爲祭酒編修宋濂爲司業

辛亥

洪武四年二月侍讀學士張以寧還自安南卒於

道初以寧冊封陳日烿爲王至界而日烿已卒
其嗣日烿代立遣使來迎詔印以寧等不從日
烿乃復遣使請命于朝以寧駐境上俟命及王
廉等至始與俱還以寧道疾卒詔有司還其柩
於家所在致祭○典簿牛諒編修王廉使安南
還皆陞工部員外郎廉固辭不拜出爲澠池縣
丞○命前侍講學士潘庭堅爲會試主司官○

遣編修蔡玄往臨濠越八日始至

上怒其慢命杖而斥之○閏三月

上閱翰林所撰武臣誥文有佐朕武功遂寧天下之語卽改作輔朕戎行克奮忠勇因召詞臣諭之

曰卿此言太過堯舜猶病博施大禹不自滿假朕何敢自爲侈大之言乎自今措詞務在平實毋事誇張○四月賜侍讀學士詹同與祭酒魏觀司業宋濂俱歸鄉旣行復召還

上親御奉天門賜燕樂甚命各賦詩以進○五月陞侍讀學士詹同爲吏部尚書

子王洪武五年正月遣待制王禕使雲南詔諭梁王把

都○前弘文館學士危素卒先是御史王著劾

素等亡國之臣不宜居侍從乃與王時謫居和

州之含山素自恨卒野史云 上在東閣素過之 上聞履聲詰為誰素

徐對曰老臣危素 上曰吾以為文天祥耳一 日謂素曰何不往和州守余闕廟遂謫居之

○二月編修蕭楫自陳才力不及且患足瘍乞

致仕詔遣醫驗之醫言足瘍已愈

上怒其媮惰杖之斥為吏○五月夏至

上將有事於北郊先一日詣齋宮大雨初霽命召兵

部尚書吳琳禮部主事宋濂率文學能賦之士

從焉於是應奉張籌偕禮部尚書陶凱工部尚書黃肅國子監學錄蕭執等十二人入見齋殿上新服網常紗巾神慮閒適顧謂曰今茲祀事是將天宇澄霽克厭朕心爾等文職陪祀宜卽時物所有賦詠以來因命賦殿下柳檜併荷露退而詩成以次呈獻

上親覽誦之品第有差焉旣而命中官傳旨令賦詩者往後殿觀梔子花人給紙一俾各賦詩詩成序進如初○是歲命禮部尚書陶凱署翰林院事

丑 洪武六年正月以舉人張唯王輝李端張翀為翰

林編脩王偁為典籍繼又以王璉張鳳任敬馬

亮陳敏俱為編修是時天下舉人至京

上命中書省擇其年少俊異者皆擢侍從賜冠帶衣

服令入禁中文華堂肄業詔太子贊善宋濂等

教之 廖學士記云濂一日燕侍上問諸生肄業進益如何濂曰無如張唯因備述其雋

才請錄為弟子上笑而許之

上聽政之暇輒幸堂中取其文親評優劣命光祿日

給酒饌每食

皇太子親王送為之主冬夏賜衣時賜白金弓矢

鞍馬寵遇甚厚○以殷哲趙震爲應奉○三月
修撰王俱等奉詔修昭鑒錄成○命禮部尚書
牛諒署翰林院事○命新授翰林院官皆回籍
祭祖省親於是編修張唯等先後給假以歸○
四月以孔克表爲修撰俾授 秦王經克表孔
子五十五世孫也○賜編修張翀馬亮陳敏等
衾褥帳几榻○七月以吏部尚書詹同爲學士
承旨兼原官兵部尚書樂韶鳳爲侍講學士○
以太子贊善宋濂爲侍講學士兼原官濂與詹
同奏言自古東宮設贊善大夫今止稱贊善似

非古制乞改為太子贊善大夫從之○宋濂脩辨茲

錄成○八月學士承旨詹同侍講學士樂韶鳳等

上所制釋奠先師孔子樂章先是洪武初元開

局校正音樂中書省禮部選通曉音樂者以聞

乃令同及太常少卿陳昧協律郎冷謙待制王

俱及儒士熊太古等奉命審音撰詞至是章成

上之○以李願證郭正傳為應奉命侍左右不

赴院野史云 上御武樓宋濂侍 上曰天下

雖定朕猶垂意宿學之士卿知其入乎濂

對曰會稽有郭傳者雖寄跡釋氏一代奇才也
上命取其文以進覽之曰誠如卿言即名見以
為翰林
應奉 復改願證名曰證正傳名曰傳○九月

修日曆以學士承旨詹同侍講學士宋濂爲總裁官樂韶鳳爲催纂官○陞修撰王傑爲待制以李叔允爲修撰○十一月學士詹同宋濂偕御史中丞劉基侍

上燕乾清宮之便閣同被酒而還時善書監生黃景在館同愛其有俊才賦詩贈之字大如掌少選內侍傳命召同等赴右順門

上乘輦而至同餘醒猶未解

上謂之曰卿醉猶未醒邪同對曰在史館中猶能賦詩贈黃秀才謂景也

上曰詩何在同對曰在史館中上顧濂亟取之既上奏

上笑謂濂曰朕卽和同詩卿當爲朕書之濂於是受命書焉同詩止稱臬才美而御製詩則并及君臣燕飲之故濂歸與臬言之以爲詞垣盛事○十二月以纂修日曆儒士朱右趙壘朱廉孫作爲編修作辭不受改太平府教授○待制王禕爲梁王所執不屈死之

詳見奉使中

甲寅洪武七年五月纂修日曆成自

上起兵臨濠至洪武六年十二月凡征伐次第禮樂

沿革刑政施設羣臣功過四夷朝貢之類莫不
具載合一百卷承旨詹同侍講學士宋濂率諸
儒上進命藏之金櫃其副藏於秘書監濂等又
言於

上曰日曆藏之天府欲見之有不可得臣請如唐太
宗貞觀政要更輯聖政爲書以傳天下後世

上從之於是分爲四十類自敬天至制蠻夷釐爲五
卷名曰皇朝寶訓自後凡有聖政史官日記之
隨類增入○學士承旨兼吏部尚書詹同致仕
○六月復以詹同爲學士承旨罷兼吏部尚書

○學士承旨詹同既復任將以年請老不敢言
上知之八月詔致仕官其一子魯名同入賜坐從容
慰勞之夜漏十刻始敕內官扶掖而出已而親
製敕賜之曰朕起布衣提三尺劍總率六師以
拯民艱延攬群英以圖至治凡二紀於茲曩者
親征武昌下城之日爾同以文章之美從朕同
游厥後任以國子博士起居注翰林學士皆舉
其職及掌吏部辨人才之賢否審職任之輕重
咸得其宜今年雖已邁猶輸誠効謀訖無少怠
可謂賢也已朕不忍卿以衰耄之年服趨走之

勞特命以翰林學士承旨致仕爾惟欽哉○九月翰林院奏進回鑾樂歌先是

太祖以祭祀還宮宜用樂舞前導命翰林儒臣撰樂章以致敬慎監戒之意諭之曰古人詩歌辭曲皆寓諷諫之意後世樂章惟聞頌美無復古意夫常聞諷諫則使人惕然有警若頌美之辭使人聞之意怠而自恃之心生蓋自恃者日驕自警者日強朕意如此卿等其誤述毋有所避至是上所撰神降祥神貺酣酒色荒禽荒諸曲凡三十九章曰回鑾樂歌其辭皆存規諫其舞分

為八隊隊皆八人禮部圖其制以上命樂工王

肄習之○十一月學士宋濂等奉詔輯孝慈錄

成○十二月修撰李叔允以年老乞致仕許之

乙卯洪武八年正月侍講學士宋濂修洪武聖政記上

之○三月侍講學士樂韶鳳等奉詔修洪武正

韻成○七月待制王僎以年老乞致仕許之致

仕後其子弘為龍江通運官偶觸丞相胡惟庸

家人舟惟庸怒寘于法罰輸作僎來視弘貧無

賞授徒市舍以給之惟庸敗上忽念僎問僎

安在左右有言其故者上即召僎慰勞之賜

以綺帛給舟車歸其父子○八月

上觀水撰秋水賦召學士宋濂等觀之且令各撰賦

以進濂率同列撰成俱於東薰閣次第投獻

上皆親覽焉復加品評於其間已而賜坐勅大官進

天厨奇珍內臣行觴

上顧濂曰卿何不盡飲濂出跪奏曰臣荷聖慈賜以醇醪敢不如詔第臣年衰邁恐志不懾氣或愆於禮度無以上承寵光爾

上曰卿姑試之濂卽席而飲將徹

上復顧曰卿宜更醕一觴濂再跪固辭

上曰一觴豈解醉人乎卒飲之濂舉觴至口又復瑟

縮者三

上曰男子何不慷慨為對曰天威咫尺間不敢重有
所瀆遂盡飲之濂醉面如赭行不成步

上大悅曰卿宜自述一詩朕亦為卿賦醉歌內侍捧

薰綾案進

上揮翰如飛須臾成楚辭一章命編修朱右重書以
遺濂諭曰卿藏之以示子孫非惟見朕寵愛卿
亦見一時君臣共樂太平之盛也濂頓首謝

上更命給事中宋善等賦醉學士歌云○是歲侍講
學士樂韶鳳致仕

丙辰 洪武九年三月陞編修張鳳為廣西叅政馬亮任

敬王璉王輝張唯陳敏典籍王侑應奉殷哲爲

監察御史廖學士記云初璉等被命攝監察御史巡行天下糾察官吏賢否諮詢生

民休戚迨歸奏對稱旨上謂近臣曰文華堂諸生如王璉等皆異日將相器也 ○五

月以宋濂爲學士承旨仍兼贊善大夫復官其

仲子璉爲中書舍人長孫慎爲儀禮司序班濂

既老艱於步履命選良馬以賜復爲作良馬歌

命詞臣咸賦之以示優寵 ○十月

上御午門樓學士承旨宋濂編脩傅藻等奏事誤由

中左門入御史吉昌等劾之詔皆勿問 ○十一

月學士承旨宋濂致仕特賜三代誥命父原贈禮部侍

郎文昭今贈禮部尚書母原贈德人今贈淑人
祖德政贈太常少卿祖母贈淑人妻封淑人誥
詞皆上親製稱濂有曰德量之
弘如千頃陂澄之不清撓之不濁將行

上曰卿去何時復來見朕乎幸相待數日姑徐徐行
由是留者數月以次年二月辭歸瀕行賜綺幣

鈔錠及御製文集

皇太子賜以衣三襲

上諭曰朕最慎于賞予卿忠誠可貫金石故以是賜
卿今年幾何矣曰六十有八

上曰藏此綺俟三十二年後作百歲衣也濂叩首謝
上復曰大江漲不可舟宜循內河達家庶幾無虞仍

俾其孫中書舍人慎護行○廣宗縣丞聶鉉秩
滿入京獻洪武聖德詩南京賦

上命爲翰林待制辭乃改國子助教

丁巳洪武十年正月召蘇伯衡至京師爲宋濂薦以自
代故也至復命爲編修伯衡以耳聵固辭乃賜
文綺鈔錠遣歸○以編修傅藻儒士徐尊生爲
應奉○二月召天下教職被薦者至京廷試之
擢南昌府教授朱善第一授修撰○以桑慎陳
晟爲編修劉仲質羅原奎黃鄰爲典籍○四月
改編修桑慎陳晟署監察御史○以翰林院官

撰誥勅遲慢命止給半俸○九月宋濂入朝越
十有四日陛見

上佇想已久廷問屢矣及見大喜加勞再三

皇太子諸王皆歡動顏色翌日

上降勅符遣儀曹賜內醪珍膳諸物抵館自是日侍
上游盤旋禁籟咨詢備至便殿侍食日晏始退恩禮
之優群臣莫敢望

上嘗喟然嘆曰純臣哉爾濂純臣哉爾濂方今四夷
皆知卿名卿其自愛濂避謝不敢

戊午洪武十一年二月停典籍劉仲質俸初

上命京朝官皆取家屬以來仲質家屬不至故罰之
○十月以應奉傅藻爲東宮文學○十二月致
仕學士宋濂來朝賜勅勞之曰臣之事君宜虔
恭不怠其得休官於家者古今有幾卿膺永壽
精力愈加自致仕之後每歲來朝甚慰朕心朕
不忍卿驅馳千里而來已勅禮部賜廩米酒肴
爾其享之以育高年

未紀

洪武十二年五月東宮文學傅藻纂春秋本末成
命典籍劉仲質及助教儲惟德校正之○七月
陞國子學助教劉子憲金珉爲應奉學正李叔

荆爲編修俱署中都國子學事○十月以王釐
爲修撰釐嘗患風疾

上賜以所御藥酒飲之遂愈○以吳沉爲待制沉字
濬仲郡以博學儒士舉至京誤上其名曰信仲
旣授官沉謂修撰王釐曰名旣誤矣冒昧而不
更是欺罔也釐以國法方嚴恐觸天威固止沉
沉不從毅然往吏部告請改正吏部以聞

上喜曰是誠恪人也遂眷遇之○十二月修撰劉泰
致仕賜之勅曰朕聞孔子之諭孝也遊必有方
斯可爲孝矣朕昨與卿遊東苑詢及卿家事卿

對以宗族甚蕃遭兵漸減獨老母在別無侍養
卿云至此朕心惕然吁哀哀父母生我劬勞今
朕雖君天下育萬民二親已逝恨不生今於朕
有戚戚焉若欲迎親就養或棄職往侍朕勿拘
焉○致仕學士承旨宋濂來朝

上曰卿多積德以致高壽雖居致仕而戀闕之心甚
切不憚祁寒每歲必以斯時來朝特賜酒肴及
日用之物卿其領之○以修撰迮原霖爲通政
司右參議

庚申洪武十三年三月降待制吳沉爲編修○四月以

國子監助教吳伯宗爲典籍御製十題命賦之
伯宗援筆立就詞語峻潔

上嘉之賜織金錦衣○應奉陳溥致仕御製詩文賜
之仍給道里費○編修張美和致仕賜之敕曰
朕聞古之賢士莫不修己行仁爲時君之用否
則獨善其身以終天年或者著書立言傳之永久
雖不顯於當時而有功於後世以其德重而行
純學博而言信也今老成宿儒凋落無幾獨爾
以衰暮之年日侍朕左右正欲詢問古今典禮
以沃朕心柰爾不任周旋所以命卿歸老卿之

去矣朕將誰從於戲千載一遇古今之通言然
全其始終者罕矣今卿善始善終不亦美乎○
五月陞編修吳沉爲待制尋降編修○八月命
設翰林國史院檢閱官

辛酉

洪武十四年三月賜本院及諫院官荅祿與權等

各羅衣一襲○五月以山西布政使趙新爲修
撰○九月改翰林國史院爲翰林院設正官學
士一人秩正五品侍講學士侍讀學士各二人
正六品首領官孔目一人雜職屬官侍講侍讀
各二人修撰二人俱正七品編修四人正八品

檢討六人正九品侍書二人待詔二人俱襍職
班次列孔目之下裁革學士承旨直學士待制
應奉檢閱典簿典籍等官是月復命仍設典籍
三人秩從八品裁侍讀學士及侍讀○陞中都
國子學署學事應奉金珉爲編修仍掌學事○
修撰趙新致仕賜之勅曰士之所以能立以保
其終者有三品焉上才之士志高量大其所爲
無所不可中才之士謹守成法不失其忠然不
至於爲惡此皆足以保其身者也惟卿質直無
僞涉獵書史始爲國子助教能舉其職及遷山

西布政使雖無所設施而持身廉潔朕以卿本
儒者而才不及中人不宜任以政務授翰林院
修撰既而見卿年老多疾特令致仕卿其保厥
終始以副朕懷○十月命法司論囚擬律奏聞
從翰林院給事中及春坊正字司直郎會議平
允然後覆奏論決○十二月命翰林院編修檢
討典籍左春坊左司直郎正字贊善考駁諸司
奏啓如平允則署其銜曰翰林院兼平駁諸司
文章事某官某列名書之○是年以孫振朱弘
道雷勵張葆爲檢討

壬戌洪武十五年正月改檢討孫振爲監察御史○二

月陞典籍劉仲質爲禮部尚書○閏二月改檢

討雷勵朱弘道爲監察御史張葆爲審刑司右

審刑○四月降編修吳沉爲典籍吳伯宗爲檢

討○改典籍劉宗政爲監察御史○五月以宋

訥爲學士賜冠服○命學士宋訥撰宣聖廟碑

文賜衣帽文綺鈔錠○六月賜學士宋訥文綺

帛各二疋鈔十錠○十月儒士沈士榮上疏言

事稱旨擢爲待詔○以楊淞爲侍書賜襲衣靴

鞮○十一月始置殿閣大學士以學士宋訥爲

文淵閣大學士掌翰林院

時吏部尚書李信侍郎高遜志奏宋訥官

銜如何書寫奉

旨做

禮部尚書劉仲質為華

文淵閣大學士翰林院

蓋殿大學士檢討吳伯宗為武英殿大學士典籍

吳沉為東閣大學士皆於翰林院履任支俸○十

二月陞典籍李翀為侍講學士賜之勅曰治天

下之美非賢何以治民非文何以昌化文所以

備載萬物闡演幽微昔有唐天下歲和時豐無

乃弘文館之設有方任館內之事者內相慮勤

以致遐邇來庭外戶不閉斗米三錢家給人足

朕欲肩之何用賢之道不齊致遺賢於遠邇今

特命爾狝居是任尚期文同韓柳勲比房杜以

昌治化汝往欽哉○以劉進道黃仲瑱為檢討

癸亥

洪武十六年正月以文淵閣大學士宋訥為祭酒

○二月東閣大學士吳沉奉詔輯精誠錄成上

之○三月武英殿大學士吳伯宗弟仲實為三

河知縣薦舉非人伯宗坐累降為檢討○六月

設尚書博士以儒士饒仲恭張庸為之仲恭授

潭王經庸授魯王經○八月東閣大學士吳沉

以進講後期為考功監所劾降為試侍書○九

月名孫大雅為待詔○十月降戶部試尚書王

峇爲檢討○十一月降僉都御史茹太素爲檢

討

甲子洪武十七年二月改侍講學士李翀爲浙江右布

政使○三月檢討吳伯宗黃仲瑱劉進道待詔

王佐李原名孔目李叔輿坐文字不以時進謫

雲南伯宗尋卒○十月秀才周煥奎高孟文入

見論時事剴切

上大喜皆擢爲待詔

實錄作檢
討者誤

○徵朱善爲待詔

乙丑洪武十八年二月命待詔朱善及前典籍聶鉉爲

會試主考官○陞朱善爲文淵閣大學士掌翰

林院張溥爲文華殿大學士董倫爲左春坊大學士俱於本院支俸溥尋罷○三月更定官制設正官學士一人秩正五品侍讀學士侍講學士各二人從五品首領官孔目一人雜職屬官侍讀侍講各二人正六品五經博士五人正八品典籍二人從八品侍書二人正九品待詔六人從九品史官修撰三人從六品編修四人正七品檢討四人從七品○以第一甲進士丁顯練子寧花綸爲修撰二甲進士馬京齊麟爲編修吳文及三甲進士蔡福南爲檢討○命進士

在六部等衙門辦事者稱進士在翰林承勅監
者稱庶吉士其俸照出身等第給之遂以黃子
澄顧觀爲翰林院庶吉士子澄三甲
觀二甲○四月修
撰花綸給假歸娶○六月復以王佐爲待詔○
八月大學士朱善給假還鄉尋卒○以左春坊
大學士董倫掌翰林院事○陞檢討茹太素爲
戶部尚書○是歲建翰林院公署成

丁卯 洪武二十年十月以劉三吾爲學士葛鈞爲侍講
學士

戊辰 洪武二十一年二月命前編修蘇伯衡編修李叔

荆爲會試主考官○以庶吉士黃子澄爲修撰
○三月以第一甲進士任亨泰爲修撰唐震盧
原質爲編修○九月以修撰吳文爲湖廣試叅
政○是歲命蒙古侍講火原潔等編華夷譯語
前元無文字但借高昌之書製蒙古字以通天
下之言至是命原潔等以華語譯之復取元秘
史參考紐切諧音旣成刊行之

庚午

洪武二十三年正月降學士劉三吾兼國子監博

士侍講學士葛鈞兼國子助教時三吾等受命
授晉世子經吏部侍郎侯庸劾奏三吾等怠於

厥職宜降調別用

上曰儒者不任劇事俱令教國子未幾命仍給二人
學士俸○四月復命劉三吾爲學士葛鈞爲侍
講學士○十月編修盧原質奔父喪詔賜驛舟
楮幣遣歸○

上以洪武正韻尚多未當命學士劉三吾等再校正
之三吾言前後韻書惟前元國子監生孫吾與
所纂韻會定正一書本之宋儒黃公紹古今韻
會凡字之切必祖三十六字母音韻歸一應可
流傳遂以其書上

上覽而善之更名洪武通韻久之三吾復奏孫吾與

韻書應有增減否

上命悉依之實錄與此小異○八月命前編修蘇伯衡為應

天鄉試考官○十一月陞待詔王佐為侍讀賜

衣服靴襪○十二月高麗國貢玳瑁筆詔分賜

翰林院學士劉三吾侍講學士葛鈞等○劉三

吾葛鈞三年考滿吏部以不稱考擬黜降之

上命三吾復職給半俸鈞閒住

辛未洪武二十四年三月以第一甲進士許觀為修撰

張顯宗吳言信為編修○以野子良為侍讀賜

姓曰埜○五月修撰黃子澄給假畢姻○六月
皇太子命復學士劉三吾全俸○十月編修唐震
卒于泗州命禮部遣官往祭之仍命還其喪于

京師

壬申洪武二十五年十二月設東宮官以修撰黃子澄
任亨泰爲詹事府少詹事兼修撰支二俸○閏
十二月學士劉三吾免時三吾壻戶部尚書趙
勉夫婦坐贓罪當死三吾詣吏部自陳素失教
誨致負深恩近被御史糾劾雖蒙恩宥竊思職
居近侍自當引退以勵廉恥吏部以聞遂免其

官○命少詹事兼修撰黃子澄署翰林院事

癸酉 洪武二十六年三月翰林院官輯稽制錄成○九

月復以劉三吾爲學士○十月改建翰林院於

皇城東之南

甲戌 洪武二十七年三月以第一甲進士張信爲修撰

景清戴德彝爲編修○四月詔定正蔡氏書傳

徵前編修張美和等任之命學士劉三吾總其

事開局翰林院時禮遇諸儒甚厚各賜以綺繒

衣被等物又御製詩命次韻和之朝參則班於

侍講之前宴享則賜坐殿中時酒樓成人賜鈔

宴其上各獻詩以謝至次年正月書成○十月翰林院公署成詔賜宴落成之

乙亥 洪武二十八年四月陞編修齊麟爲禮部侍郎盧原質爲太常少卿○六月以編修馬京署通政司事尋實授左通政○十一月翰林院輯禮制

集要成

丙子 洪武二十九年三月賜文官五品以上及翰林官高麗布人一疋○五月命詹事府翰林院於午門內出入者各給牌爲驗○六月陞編修張顯宗爲太常寺丞賜衣一襲○九月陞修撰許觀

爲尚寶司卿○十月陞編修景清署都察院都

御史

諸史作御
史者誤

尋實授左僉都御史○十一月

陞修撰張信爲侍讀編修戴德彛爲侍講諭之
曰官翰林者雖以論思爲職然旣列近侍旦夕
在朕左右凡國家政治得失生民利病當知無
不言昔唐陸贄崔群李絳之徒在翰林皆能正
言讜論補益當時顯聞後世爾等當以古人自
期毋負朕擢用之意○翰林院官輯稽古定制
成

丑下
洪武三十年二月命學士劉三吾爲會試主考官

○三月以第一甲進士陳郊為修撰尹昌隆劉
諤為編修○是科西北士人無一登第者乃訐
奏考官學士劉三吾紀善白信蹈等徇私不公

上命侍讀張信侍講戴德彝贊善王俊華司憲長史

黃章修撰陳郊編修尹昌隆劉諤等十餘人翻

閱落卷復取西北士六十一人既而以信等校

閱不精怒之時以信等不用心批點且所進卷
有一氣交而萬物成及至尊者君

至卑者臣
等語故怒乃逮三吾及信等悉置於法獨德彝

昌隆釋不誅三吾所舉第一人宋琮安置威遠

衛命榜其事以示戒南雍志云宋琮明於易數
謂其同進諸士曰旬月間

翰林多罪，廖琮其竄乎人，初不之信也。已而果然。野史云：陳郊明，天文傳臚之辰，謂其同年曰：文星不明，今年狀元必不利。已而唱名，即郊也。○四月命太常卿黃子澄署翰林院事。○六月以覆試第一甲進士韓克忠為修撰，王恕、焦勝為編修，及行人司副陳誠、行人陳性善為檢討。○七月命張顯宗署祭酒，韓克忠署司業。○是歲改侍講戴德彝編修。

尹昌隆為監察御史。

戊寅 洪武三十一年六月，少帝即位，召董倫為學士，御

書怡老堂三大字，及髹几、玉鳩杖各一，賜之。倫謝

表畧曰：臣素無閱閥功勞，兼乏智能，才藝徒知篤信于古道，自分無用于明時，幸蒙高皇帝

之知忝拜左春坊之命任臣以兩宮輔導之職
稱臣爲三葉帝王之師茲者踐阼之初乃復馳
書以召蒼顏白髮萬里來歸金馬玉堂十年如
昨又曰桓榮設几杖于太常不聞宸翰之賜晏
殊題舊學于神道未見几杖之頒自今將杖以
戒噎則當思四海或有饑餒之民憑几以安身
則當念一物或有顛連之歎

○名方孝孺爲博士進侍講俾

直文淵閣備顧問講經史

孝孺有詩曰斧屢臨軒几硯寒春風和氣

滿龍顏細聽天語揮毫久携得香烟兩袖還又
曰風軟彤庭尚薄寒御爐香繞玉闌干黃門忽
報文淵閣天子
看書名講官

卯巳建文元年正月有事於南郊侍講方孝孺撰郊祀

頌以獻○二月陞董倫爲禮部侍郎兼學士仍

掌院事支正三品俸○詔修

太祖高皇帝實錄以學士董倫為總裁官○三月改

翰林院孔目為吏目秩如故以徐通為之是年正月

至十一月任本院者學士董倫侍讀學士高遜志侍講方孝孺檢討陳誠陳性善典籍馬定及

通七月贈故翰林院待制王禕為學士謚文節

褒死義也○八月命侍講方孝孺為應天鄉試

主考官○十二月省躬殿成命侍講方孝孺為

之銘

庚辰建文二年二月命學士董倫為會試主考官○三

月以第一甲進士胡靖王艮李貫為修撰二甲

進士吳溥劉現楊子榮楊溥為編修○五月召

漢陽知縣王叔英爲修撰○六月召解縉於河
州以爲待詔○八月更定官制設學士承旨一
人學士一人罷侍讀侍講學士設文學博士二
人改吏目爲典簿所屬文翰館設侍讀侍講各
二人侍書無定員文史館設修撰編修檢討各
四人又改華蓋文華武英殿文淵閣大學士爲
學士罷東閣設正心殿學士各設待詔無定員
文淵閣設典籍二人皆隸翰林院文學博士從
五品典簿正
九品侍讀侍講正六品侍書正七品修撰正
六品編修從六品檢討正七品待詔正九品○
陞侍講方孝孺爲文學博士改中書舍人李燁

芮善吳均朱思平姚友直朱吉劉彥銘爲侍書

是月及九月見任者學士董倫文學博士方孝
孺典簿徐通侍書李燁芮善吳均朱思平姚友
直朱吉劉彥銘試侍書聶同文王遂修撰胡靖
王艮李貫編修吳溥劉現楊子榮楊溥檢討陳
性善文淵閣待詔

解縉端禮王延齡

○是歲敕翰林諸臣集經史

中事蹟編爲類書以攷治亂爲鑒戒命文學博
士方孝孺領其事修撰胡靖編修楊溥等提調
之徵四方文學之士與同編纂開局於內府六
科廊下至次年十一月藁成○以處士唐愚士
爲侍讀愚士有文學方孝孺薦之故有是命

辛巳建文三年閏三月侍讀唐愚士卒命有司給舟歸

葬○九月修撰王艮卒遣禮部侍中黃觀諭祭

○十一月實錄成以纂修知縣王景爲侍講儒

士楊士奇爲吳府審理副士奇仍供事翰林院

壬午建文四年五月靖難師逼江北遣修撰王叔英募

兵勤王○六月靖難師入京師文學博士方孝

孺修撰王叔英等死之初孝孺以文學被知遇

參預國事靖難師起日畫策左右至是師入金

川門宮中自焚孝孺持斬衰服晝夜號哭

成祖卽位欲詔天下問左右誰可代草者或以孝孺

對遣人召之數次皆不至乃使擁之入見孝孺

至益悲慟聲徹殿陛間左右禁之不能止

成祖親降榻慰諭之曰此我家事耳先生何苦又曰

先生為我作詔命左右授以紙筆孝孺大批數

字訖擲筆於地曰死即死耳詔不可草

成祖曰爾不畏滅九族耶孝孺曰即滅十族何如

成祖大怒命殊諸市宗族親友夷誅者八百七十三

人叔英募兵至廣德州聞變亦自縊死是時故

翰林諸臣若太常卿黃子澄都御史景清副都

御史練安左拾遺戴德彝侍中黃觀僉都御史

陳性善太常少卿盧原質咸先後死節云

是時歸附

文廟者學士董倫侍講王景侍書鄒進黃淮吳均劉彥銘芮善試侍書吳勝鮑鱗修撰胡靖李貫編修吳溥楊子榮劉現楊溥檢討鄭好義待詔解縉王延齡李幹七月幹致仕○是月三日燕師已臨江董倫遣公使人武一佃人楊璽往城外收所畜羊鷺等物恐為守城軍士所阻給符牒以行其牒尚存故牘中此與問飼豕者何異至七月四日倫於奉天門自言臣如今年老不能辦事了成祖曰你致仕了罷倫怏怏以行出城數日遂卒今遺忠錄猶以抱節目之殊未考耳

洪武三十五年七月即建文四年靖難後改稱今號命復翰林院

官制如洪武之舊○先是御史府左副都御史

練安舉桐城知縣胡儼學貫天人才堪大用少

帝召至京未及用而敗至是吏部以為言

上令欽天監官試以天文儼果諳之遂命送翰林院

辦事○復翰林院侍書黃淮芮善劉彥銘鄒進

吳均唐恕王遂鮑鱗爲中書舍人○命禮部侍

郎兼學士董倫致仕以侍講王景爲學士○擢

吳府審理副楊士奇爲編修○以儒士曾日章

爲侍讀國子助教鄒緝爲侍講給事中金幼孜

王洪桐城知縣胡儼俱爲檢討○陞待詔解縉

爲侍讀修撰胡靖爲侍講編修吳溥楊子榮爲

修撰檢討鄭好義爲編修擢太平縣訓導蕭引

高爲檢討應天府訓導王汝玉蕪湖縣訓導張

伯穎爲博士儒士沈度潘畿爲典籍特改縉名
薦子榮名榮○八月陞中書舍人黃淮爲編修
○九月開內閣於東角門內召解縉黃淮胡靖
胡儼楊榮楊士奇金幼孜七人入直其中參決
機務明日賜金織羅衣各一襲○特命翰林院
官牙牌禮部重造給之舊者勿用○衢州府開
化縣生員金寔汪錡具奏敷陳王道

上命翰林院試之學士王景等以寔所對問策中式
聞命送翰林院辦事○十一月陞侍讀解薦爲
侍讀學士侍講胡靖編修黃淮檢討胡儼皆侍

讀修撰楊榮編修楊士奇檢討金幼孜皆侍講
命薦仍名縉

癸未

永樂元年六月以實錄成陞纂修官太常博士錢

仲益知縣楊觀梁潛王褒爲修撰國子助教王
達給事中朱絃爲編修行人蔣驥爲檢討國子
博士金玉鉉爲五經博士晉府伴讀蘇伯厚爲
侍書教諭解榮劉宗平爲待詔生員金寔爲典
籍○右庶子兼侍講楊溥以母憂去位○七月
上諭侍讀學士解縉等曰天下古今事物散載諸書
篇帙浩穰不易檢閱朕欲悉採各書所載事物

類聚之而統之以韻庶幾考索之便如探囊取物耳嘗觀韻府回溪二書事雖有統而采摘不廣紀載太畧爾等其如朕意凡書契以來經史子集百家之書至於天文地誌陰陽醫卜僧道技藝之言備輯爲一書毋厭浩繁○八月命侍讀胡靖編修王達爲應天鄉試主考官○遣待詔王延齡使朝鮮行人朱彬副之賜衣一襲及鈔錠錦衣裘狐帽○九月胡靖請復舊名爲廣許之○十月侍講楊榮給假回籍○起復右庶子兼侍講楊溥○十二月命侍讀學士解縉

專直內閣勿預院事○擢舉人王僈爲翰林院
檢討旣命下

上問左右曰翰林檢討之下何官對曰博士典籍侍
書待詔又問皆已除人未對曰已除又問其賢
視僈若何對曰僈初除未知其爲人如舊博士
中皆老成文學士

上嘆曰古所謂用人如積薪此類是已國家用人以
賢以勞僈之賢旣未可知勞亦未有而令賢有
勞者位其下何以服士心命吏部凡翰林自博
士以下皆陞職與僈同遂陞張伯穎王汝玉典

籍沈度潘畿侍書蘇伯厚待詔王延齡劉宗平
解榮皆爲檢討○侍讀學士解縉等奉勅修古
今列女傳成賜縉及侍讀黃淮胡廣胡儼侍講
楊榮金幼孜楊士奇檢討王洪蔣驥典籍沈度
文綺衣各一襲鈔有差

甲永樂二年正月以陳仲完爲編修○二月命侍讀

學士解縉侍讀黃淮爲會試主考官○三月侍
讀楊榮復任○簡東宮官陞侍讀學士解縉爲
學士兼右春坊大學士侍讀黃淮爲左庶子胡
廣爲右庶子胡儼爲左諭德皆仍兼侍讀侍講

楊榮爲右諭德仍兼侍講楊士奇仍爲侍講兼
左中允修撰李貫爲左中允仍兼修撰編修楊
溥爲洗馬陳仲完爲左贊善皆仍兼編修檢討
王汝玉爲右贊善仍兼檢討○陞編修王達爲
侍讀學士○擢第一甲進士曾棨爲修撰周述
周孟簡俱爲編修仍命於二甲三甲中擇能文
楊相宋子環王訓王直秦政學徐安吾紳彭汝
器周忱劉子欽周文李寧張徹章朴歐陽俊盧
翰梁任熊直王道曹景輝陸孟良蕭省身劉孟
鐸柴廣敬張宗璉田忠曾與賢洪鍾洪順余學

夔陳滿蕭清劉紹林鳳張憲殷昇嚴光祖涂順
段民李貞江鍊章敞倪維哲許瑨陳敬宗王仲
壽李迪袁添祿李時勉楊粲能書湯流王英孫
奉余鼎李永年袁邇周遠鍾旭彭禮戴弘演俱
爲翰林院庶吉士俾內府讀書習字命學士解
縉蒞之已而戶部辦事進士李衡自陳年未三
十政事生疎願赴翰林院讀書以圖前進補報
許之仍照例改爲庶吉士○特命戶部辦事進
士楊勉爲本院庶吉士俾同習字○又命禮部
覆選下第舉人得能文張鉉等五十人能書袁

璞等十人俾內府讀書習字各賜冠帶支教諭

俸

實錄以爲送
監讀書者誤

○四月立進士題名記於太學

命侍讀學士王達撰文檢討沈度書石○以進

士沈升孫子良李昌祺羅汝敬涂敬蕭寬褚讓

獨孤樂善陳士啓陳綱董鏞劉子敬陳伯恭陳

資善趙曾趙濟劉剛龍儀劉澄黃陽俱爲本院

庶吉士內府修書○五月改諸司辦事能書進

士曾慎魏騏吳惇漆霽趙理趙琰韓庸史彬徐

觀樊靜曹彥昌陳旭田堉羅處富邢旭曾恕王

宅葉貞陳興俞禮趙濬恭潘中徐聆胡秉彝周

志義俞益曹睦陽儀鳳譚原性爲本院庶吉士
復取監生王敏等二十五人俱於內府修書○
降祭酒徐旭爲修撰先是旭坐書奏不謹爲禮
科所劾降雲南叅議未行

上問吏部尚書蹇義旭爲人何如對曰有文學持守
而於人寡合

上曰持守之人固當寡合蓋其中有所主而不能脂
韋依阿於外况兼有文學宜寘之近侍遂命爲
翰林院修撰○六月吏部奏諸司添設員額數
多俱合裁減

上從之特令翰林院官毋動○吏部復奏庶吉士進

士舊例各照出身選除緣今缺少人多若令辦

事日久亦致不便除專一讀書習字庶吉士不

動外其他合依登科次序止存數十人在京候

選餘悉遣歸原籍從之於是修書庶吉士中留

獨孤樂善陳士啓蕭寬李昌祺羅汝敬沈升孫

子良楮讓吳惇魏騏陳旭韓庸葉貞趙理徐聆

十五人仍於本院辦事其餘三十四人取選尚

遠俱遣之已復遣習字舉人張鉉等亦令回籍

○七月侍讀學士王達侍東宮講書進講乾卦

九四一爻舉儲貳爲說

皇太子問楊士奇達得無含諷否士奇對曰講官非正道不陳豈敢譏諷此宋儒胡瑗之說也

皇太子曰易旨無之若遇庸人亦將爲茲說乎士奇曰程子有云凡卦六爻聖賢有聖賢用衆人有衆人用君有君用臣有臣用

皇太子悅遂命諸臣分撰五經講義以進○八月命侍讀曾日章清理軍職貼黃先是刑部侍郎劉季箎被命清黃至是回部管事

上命再於翰林院選官一員代之故有是命○九月

上御右順門召翰林學士解縉侍讀黃淮胡廣胡儼
侍講楊榮楊士奇金幼孜諭之曰朕即位以來
爾七人朝夕相與共事不離左右朕嘉爾等恭
慎不懈故在宮中亦屢言之然恒情保初易保
終雖朕固常存於心爾等亦宜謹終如始庶幾
君臣保全之美縉等叩首言

陛下不以臣等淺陋過垂信任敢不勉勵圖報

上喜皆賜五品公服又曰皇后數言欲召見爾七人
命婦郎赴柔儀殿見是日縉等之妻入見

中宮訓勞備至皆賜五品冠服及鈔幣表裏○十一

月庶吉士李衡自陳父李伯顏帖木兒先任玉山知縣洪武中死於法臣係極刑家屬不當仕於朝吏部爲言衡既有父極刑例當邊遠叙用但係進士出身才學可取惟上裁之

上曰古之聖人亦有罪其父而用其子者但爲子能改父行致顯聞於世足以爲賢若以父死非命終身不仕亦未必合中道爾能力學以圖進用雖違令而志可嘉朕不爾罪其勉之○擢富平縣丞陸具瞻爲編修○翰林院學士解縉等進所纂錄韻書賜名文獻大成賜縉等百十七人

鈔有差錫宴于禮部旣而

上覽所進書尚多未備遂命重修而勅太子少師姚
廣孝刑部侍郎劉季篔及縉總之命學士王景
侍讀學士王達祭酒胡儼洗馬楊溥儒士陳濟
爲總裁侍講鄒緝修撰王褒梁潛吳溥李貫楊
觀曾棨編修朱紘檢討王洪蔣驥潘畿王偁蘇
伯厚張伯穎典籍梁用行庶吉士楊相左中允
尹昌隆宗人府經歷高得暘吏部郎中葉砥僉
事晏璧爲副總裁命禮部簡中外官及四方宿
學老儒有文學者充纂修簡國子監及在外郡

縣學能書生員繕寫開館於文淵閣命光祿寺
給朝暮膳○十二月給學士王景等福囊各一
○賜學士王景侍讀學士王達等各文綺一襲
學士解縉侍讀黃淮胡廣侍講楊榮楊士奇金
幼孜所賜服色特與尚書同縉等入謝

上曰朕於卿等非偏厚代言之司機密所寓况卿六
人旦夕在朕左右勤勞助益不在尚書之下故
於賜賚必求稱其事功何拘品級又曰朕

皇考初制翰林長官品級與尚書同卿等但盡心職
任孔子云君使臣以禮臣事君以忠君臣各盡

其道耳

乙酉 永樂三年正月

上命左庶子黃淮右庶子胡廣於進士曾棨楊相等
中選二十八人俾專學班馬韓柳歐蘇等文勿
預他務選畢其率以來翌日淮等選修撰曾棨
編修周述周孟簡庶吉士楊相劉子欽彭汝器
王英王直余鼎章敞王訓柴廣敬王道熊直陳
敬宗沈升洪順章朴余學夔羅汝敬盧翰湯流
李時勉段民倪維哲袁添祿吾紳楊勉二十八

人入見

實錄以爲解
縮選取者誤

上諭之曰人須立志志立則功就天下古今之人未
有無志而能建功成事者汝等簡拔於千百人
中爲進士又簡拔於進士中至此固皆今之英
俊然當立志遠大不可安於小成爲學必造道
德之微必具體用之全爲文必並驅班馬韓歐
之間如此立心日進不已未有不成者古之文
學之士豈皆天成亦積功所致也汝等勉之朕
不任爾以事文淵閣古今載籍所萃爾等各食
其祿日就閣中恣爾玩索務實得於已庶國家
將來皆得爾用不可自怠以孤朕期待之意時

庶吉士周忱自陳年少願進學

上喜曰有志之士也命增忱為二十九人遂命光祿

寺給朝暮膳司禮監給筆札內府月給膏燭鈔

人三錠兵部給阜隸工部擇近第居之

廖學士記云

上數召庶吉士至便殿問以經史諸子故實或至抵暮方退五日一休沐使內臣隨之校尉備

騶從人皆歆其榮艷上時搜奇書僻事以驗

所學祭等多對誦如流者上甚喜之多所獎

賚恒顧羣臣曰秀才輩性子直可親近解縉嘗

以鍾山龍蟠詩試諸人甚稱彭汝器所作一日

上問捕蛇者說汝器即朗誦於前甚奇其才王

訓以大江繞金陵賦進上最稱之於時程試

課業大嚴賞罰而王英

王直尤為儕輩所推云 ○以儒士馬巨江為五

經博士巨江有才學隱居不仕

上在藩邸聞其名及是召至將用之而巨江以老固
辭遂授博士賜紗帽銀帶襲衣及璽書褒諭令
致仕○陞編修陸具瞻爲趙府左長史以具瞻
嘗授學趙王云○七月取雲南監生施玉等六
名習譯百夷字隸本院此譯字
生之始○八月命學士
王景侍讀學士王達爲應天鄉試主考官○九
月

上以讀書習字庶吉士數多禁中不足容命於國學
構宇取嘉名名堂居之禮部奏言國學地陜難
以構造唯翰林院後堂閒空可以處之

上從其言遂以次月二日遷庶吉士於翰林院○十一月庶吉士章朴以謝恩失悞爲鴻臚寺所劾命發天禧寺修浮圖○十二月庶吉士殷嘒奏父殷式原充興武衛軍士乞容迎養

上不悅命以嘒代父軍

丙戌永樂四年二月命侍讀學士王達洗馬兼編修楊溥爲會試主考官○修撰徐旭爲會試同考官卒於試院計聞賜棺及遣官賜祭○三月

上視太學賜學士等官解縉黃淮胡廣楊榮楊士奇金幼孜二品金織羅衣各一襲○擢第一甲進

士林環爲修撰陳全劉素爲編修同曾啓等讀書又慮下第舉人中有遺才復廷試之取文學優等二十一人各賜冠帶支教諭俸特命周翰藍勛送翰林院讀書給飲食燈油鈔一如啓等

一等人三人首翰次勛俱本院讀書次李弼授紀善二等人王樂孟等十八人俱入監肄業

選第二甲第三甲進士江殷胡啓先孫迪張叔豫李岳潤陳孟潔張文選鄭復言曾春齡蕭福曹閻盧永黃獻及原選修書舉人朱璿凡十四人改庶吉士文淵閣修書○復以進士黃安王資益王信功黃所載鄭回趙圭陳夢京羅仲深

邵輝吳致文徐廷圭鄧成周煒陳實謝霖楊復
王瀾樂時逢劉本黎常爲庶吉士文淵閣修書

○四月

上問學士解縉文淵閣經史子籍皆備否對曰經史
粗備子籍尚多闕

上曰士人家稍有餘貲皆欲積書况於朝廷可闕乎
遂名禮部尚書鄭賜令擇通知典籍者四出搜
求遺書且曰書籍不可較直惟其所欲與之庶
奇書可得耳○學士王景以白衣習朝賀儀被
劾遠問尋宥之○遣侍讀學士曾日章齋敕諭

西平侯沐晟於軍中○七月待詔潘若水以前
在齊府預逆謀事覺得罪○賜左庶子兼侍讀
等官黃淮胡廣楊榮楊士奇金幼孜二品金織
紗衣各一襲○閏七月召北京儒士武周文至
勞諭甚至特命爲侍讀學士賜冠金織羅衣一
襲明日入謝以其老賜敕令致仕

上語侍讀胡廣等曰朕守藩時閒暇喜觀易時王府
官亦有知易者然皆不若周文切實但所言亦
有拘滯不流動處蓋易道妙在變通古人隨時
從道之說最得要領亦在虚心以玩之耳○

上御奉天門侍讀學士致仕武周文陟辭命留之賜坐與語良久

上曰卿篤學惇德宜在朕左右然春秋高矣不欲煩勞宜歸家享子孫奉養以終天年周文起頓首謝又命賜酒饌楮幣給驛傳送至家

上顧謂侍讀胡廣等曰周文亦操履端方廣等對曰陛下待儒臣進退之際恩禮俱至儒道光榮多矣

上笑曰朕用儒道治天下安得不禮儒者致遠必重良馬粒食必重良農亦各資其用耳○九月編修鄭好義檢討王汝玉與禮部尚書李至剛郎

中夏止善太常博士劉履節等以編纂洪武禮書增減不一俱命戴罪重行整理至十二月釋還原職唯至剛仍以平巾修書○

上聞翰林院讀書庶吉士王訓湯流柴廣敬相繼病卒歎息謂侍臣曰朕深有望文學之士復前古之盛故簡拔此二十八人者加厚作養之庶天下才俊有聞而興起者曾不幾時連失三人何其成之難而喪之易也咨嗟久之○十一月修撰王褒坐書奏不謹

時褒奏討官房疏內擦改一搬字

謫爲都

察院書吏旣而釋之復其職

丁亥永樂五年二月出學士解縉為廣西叅議○三月
命禮部選監生蔣禮等三十八人習譯夷字置
館於長安右門之外處之以四夷字學分為四
齋曰百夷曰達達曰回回曰四夷隸本院○四
月

皇長孫出閣就學

上召太子少師姚廣孝待詔魯瑄鄭禮等諭之賜金
織羅衣各一襲命大官給旦暮酒饌○賜侍讀
等官黃淮胡廣楊榮楊士奇金幼孜金織雲鶴
紗衣各一襲○侍讀曾日章卒於雲南○五月

孔目胡撫有罪謫戍交趾初撫應詔保舉有司以故人烏程知縣李信薦得擢忻州知州既而信以十縑酬撫撫受之事覺故得罪○修書教授周鼎等就吏部選引赴內府考試侍講鄒緝洗馬楊溥修撰朱紘檢討王偁待詔解榮孔目賈溫庶吉士羅汝敬等二十餘人代爲撰寫詩文事覺下獄俱謫戍遠方已而宥之命革冠帶以平巾修書至七月復原職○六月命祭酒兼侍講胡儼入院供史事○侍讀學士王達卒

達病

三月乃卒野史以爲服銀屑死者妄也

修撰吳溥擅掌印信詔遠

問當贖罪降用

上宥之乃命右庶子兼侍讀黃淮署院事○七月神
樂觀醴泉出命胡廣撰碑文記之○賜侍讀黃
淮胡廣侍講楊榮楊士奇金幼孜各綵幣五表
裏白金二十兩米四石鈔二百錠○十月監督
修書官姚廣孝奏副總裁王偁恣肆怠惰狀請
罪之

上命戴罪供職○十一月陞右庶子兼侍讀胡廣爲
翰林院學士兼左春坊大學士掌院事左庶子
兼侍讀黃淮爲右春坊大學士仍兼侍讀右諭

德兼侍講楊榮爲右庶子侍講兼左中允楊士
奇爲左諭德侍講金幼孜爲右諭德皆仍兼侍
講侍講鄒緝兼左中允修撰曾棨林環皆陞侍
講修撰梁潛兼右贊善檢討沈度及庶吉士彭
汝器王直余鼎王英羅汝敬皆爲修撰仍命吏
部臣曰廣等侍朕日久繼今考滿勿改外任○
重修文獻大成書成凡二萬二千二百一十一
卷一萬一千九十五本更賜名永樂大典仍命
謄寫刊刻以行○以交趾儒士夏時中爲典籍
時交趾初平命總兵等官舉明經能文及聰明

正直懷才抱德者至京用之於是時中及甘潤
祖等四十餘人先後至皆以爲博士典籍待詔
等官不令管事賜冠帶衣服衾被及其家屬月
米既而交趾以保舉來者至千餘人

上以爲勞擾使人於中道止之廼除潤祖等爲諒江
府同知等官唯時中留任本院凡十二年以給
由如北京卒於道

子戊永樂六年正月賜學士等官胡廣楊榮黃淮楊士

竒金幼孜各絲幣二表裏白金十兩鈔五百貫

○五月命習夷字監生每等各增十名仍許應

試其試文用所習夷字書於卷末別闕之○先是永樂大典書成命選留修書官員人等八百人以供膳寫餘悉放之仍選優於詩文者以奏凡得十餘人至是命翰林院覆試之止取陳壽王恭鄭叔美黃約仲朱士行五人命皆以爲典籍○六月學士王景卒景以病不視事者二載矣至是卒○提督膳寫大典禮部尚書鄭賜奏言頃者太子少師姚廣孝患病刑部侍郎劉季篾緣事臣又署理部事提調缺人乞委副總裁修撰梁潛專一提調從之已而潛言正總裁祭

酒胡儼洗馬楊溥堪以總理臣不堪獨任遂命

儼溥與潛一同提調楊士奇作梁潛墓碑與此少異○八月命

修撰李貫檢討王洪為應天鄉試主考官○九

月陞修撰吳溥為司業○十一月右贊善王汝

玉編修鄭好義坐前重修禮書中多錯落當詐

為制書及增減者律罪死各發北平戍邊已而

皇太子憫汝玉年老且重其文學獨宥之降為翰

林院典籍

丑巳永樂七年正月車駕幸北京以學士胡廣庶子楊

榮諭德金幼孜侍講曾棨修撰沈度彭汝器王

英羅汝敬金鼎典籍陳壽黃約仲待詔魯宣鄭
禮扈從賜廣榮幼孜三人錦衣狐裘鞍馬時榮
有母喪特留之○庶吉士倪維哲自請隨侍北
京歷覽山川以廣耳目

上曰善許之○二月以右春坊大學士兼侍讀黃淮
署翰林院事○

皇太子命侍講鄒緝左司直郎徐善述爲會試主
考官○三月車駕抵北京賜學士胡廣等宴楊
榮辭以憂弗與特命中官以珍饌賜其家○晉
州儒學訓導荆聿以服闋至吏部啓聞

皇太子命爲翰林院孔目溫習學業以待別用○

六月

上賜書

皇太子令諭右春坊大學士兼侍讀黃淮左春坊
諭德兼侍讀楊士奇以

太祖高皇帝御製文集及洪武實錄付翰林院官鄒
緝梁潛李貫王洪送赴北京仍令淮士奇於朝
臣內慎舉謹厚篤實文學可稱者數人偕來遂
以侍講林環編修朱紘庶吉士李時勉陳敬宗
同赴行在○改御史歐陽謙爲行在翰林院編

修○七月

皇太子陞典籍王汝玉爲右贊善兼編修○十一月以讀書舉人周翰藍勗爲典籍

庚寅

永樂八年七月舉人周南獻平胡頌

皇太子命送翰林院偕庶吉士讀書○賜扈從北征文職官鈔及綵幣表裏有差特命學士胡廣侍講楊榮金幼孜賜同尚書○十一月

皇太子遣黃淮迎車駕於滁州以左諭德兼侍讀楊士奇署翰林院事○十二月學士胡廣扈從歸復掌院事

辛卯永樂九年正月右庶子兼侍講楊榮奏乞奔母喪

許之先是榮聞母喪時值車駕巡狩北京命榮扈從特謂榮曰俟朕北還令汝奔喪至是榮申前請賜鈔一千貫命中官宋成馳傳送歸且勅榮速來○三月擢第一甲進士蕭時中爲修撰苗衷黃暘俱爲編修第二甲第三甲進士楊慈劉永清陳璠錢習禮黃壽生陳用俱爲本院庶吉士辦事本院鍾瑛張習張式馬信邵聰初自國子生選入本院習譯書至是中第亦改庶吉士仍隸本院習譯○四月下贊善兼編修王汝

玉獄尋命戴罪讀書○六月右庶子兼侍講楊
榮奔喪還至京○解縉有罪徵下獄縉先爲本
院學士兼右春坊大學士甚見寵任坐廷試讀
卷不公出爲廣西右叅議會有言縉嘗洩建儲
時密議者遂改交阯命專督化州餽餉時檢討
王侂有罪謫隨總兵官在交阯二人遂共趨廣
東娛嬉山水忘返縉又上言請用數萬人鑿贛
江以通往來

上曰爲臣受事則引而避去乃欲勞民如此併侂皆
下獄後數歲皆瘦死初縉之下獄也獄吏拷治

索所與同謀者縉不勝楚書大理寺丞湯宗宗
 人府經歷高得暘禮部郎中李至剛右中允兼
 修撰李貫右贊善兼編修王汝玉編修朱紘檢
 討蔣驥潘畿蕭引高等塞責皆下獄後得暘貫
 汝玉紘引高相繼死獄中○八月命學士兼左
 春坊大學士胡廣右庶子兼侍講楊榮為應天
 鄉試主考官○九月陞檢討王洪為修撰○十
 月重修

太祖高皇帝實錄

上即位之初命曹國公李景隆等監修而景隆等心

術不正又以急成未極精詳

上巡幸至北京之初命學士胡廣等重修之至是命
太子少師姚廣孝戶部尚書夏原吉爲監修官
學士兼左春坊大學士胡廣祭酒兼侍講胡儼
右春坊大學士兼侍讀黃淮右庶子兼侍講楊
榮爲左總裁左諭德兼侍講楊士奇金幼孜等
爲纂修官皆賜敕勉勵○十一月賜學士等官
米十石

壬辰永樂十年二月命給六部尚書及翰林官胡廣黃

淮楊榮楊士奇金幼孜誥命及封贈其祖父母
父母及妻如制盖特恩也時翰林中惟黃淮父
思恭尚在得冠帶如例云○命右諭德兼侍講
楊士奇金幼孜爲會試主考官○三月命第一
甲進士馬鐸爲修撰林誌王鈺爲編修進士內
原習譯書蔣禮趙勗徐俊何賢潘勤黃裳羅興
楊榮張觀王觀馬馴王璜劉濬胡讓邵暹米顯
方復原選習字胡敬皆爲庶吉士仍隸本院習
譯習字○擢本院習字州判張侗庶吉士胡敬
監生程玖秀才朱孔暘沈粲許鳴鶴王孟端朱

暉楊本陳宗淵龐振舒章晒如並爲中書舍人

仍隸本院學書制敕初侗等咸以能書薦入內

府辦事已數年至是悉授以官云○命刑部辦

事進士戴乾饒安劉翀於翰林院讀書習字以

三人爲二甲高等故也據本院故牘三人止稱進士不係庶吉士實錄

於是年八月云擢翰林院庶吉士劉翀爲禮科給事中疑誤○賜學士等官

胡廣黃淮楊榮楊士奇金幼孜二品金織紗衣

各一襲○四月賜在京文武百官夏布有差學

士胡廣等五人賜同尚書○五月命取國子監

舉人朱南等一百二十人習夷字有梁弘者獨

告免

上怒編伍交趾○七月賜在京文武堂上各官堯羅
綿被有差學士胡廣等五人賜同尚書○八月
以庶吉士吾紳洪順周忱楊相劉子欽段良楊
勉章敞陳敬宗李時勉倪維哲俱爲刑部主事
○八月選監生張磐韓璽陳諒卜謙陳盟侍

皇太孫說故事仍命於翰林院讀書以便隨侍○
十一月命右庶子兼侍講楊榮往陝西偕豐城
侯李彬經略甘肅邊事

癸巳 永樂十一年二月車駕幸北京以學士胡廣庶子

楊榮諭德金幼孜侍講鄒緝曾祭林環修撰沈
度王英王直王洪典籍周翰陳壽待詔李遜鄭
禮及習譯庶吉士蔣禮等十五人扈從○以右
春坊大學士兼侍讀黃淮署翰林院事

甲午永樂十二年七月諭胡廣楊榮金幼孜曰五經四

書皆聖賢精義要道傳註之外諸儒議論有發
明餘蘊者爾等采其切當之言增附於下其周
程張朱諸君子性理之言如太極通書西銘正
蒙之類皆六經之羽翼然各自爲書未有統會
爾等類編二書務極精備庶垂後世命廣等總

其事仍命舉朝臣及在外教官有文學者同纂
修開館行在東華門外命光祿寺給饌○八月
北京行部請鄉試命侍講曾棨侍講兼左中允
鄒緝爲主考官○

皇太子命洗馬兼編修楊溥編修周述爲應天鄉
試主考官○修撰馬鐸蕭時中編修陳全周孟
簡林誌以陪祀不候享胙先出爲鴻臚寺官所
劾

皇太子命宥之○九月徵黃淮及楊士奇等赴行
在下獄先是

上以

皇太子所遣使迎車駕緩且奏書失辭曰此輔導者之不職遂徵右春坊大學士兼侍讀黃淮等淮先至行在六部都察院大理寺通政司交奏其罪遂下獄後二日左諭德兼侍講楊士奇及司經局正字金問至

上曰楊士奇姑宥之朕未嘗識金問何以得侍東宮命法司鞠之已而召士奇至前親問東宮事士奇叩首言殿下孝敬誠至凡所稽違罪在臣等上悅而罷於是行在六部都察院大理寺通政司十

二道監察御史交章奏士奇罪不宜獨宥乃下
錦衣衛頌繫之遂徵司經局洗馬楊溥芮善相
繼下獄皆以金問辭連之也○以修撰馬鐸署
院事○閏九月召修撰蕭時中編修周述陳全
林誌至行在翰林院同纂性理大全等書○十
二月釋楊士奇獄○學士兼左春坊大學士胡
廣以母憂去位

未
乙
永樂十三年正月以左諭德兼侍讀楊士奇署翰
林院事○二月會試貢士於北京命修撰兼贊
善梁潛修撰王洪爲主考官○三月命第一甲

進士陳循爲行在翰林院修撰李貞陳景著爲
編修仍命同纂修性理大全等書第二甲第三
甲進士洪英王翱林文稭馬驥宋魁陳鏞曾弘
林道節胡瀨章文昭嚴珊金關王瑛鄭珞袁璞
周崇厚習侃鄭雍言牟倫呂棠張益黃仲芳廖
謨宋琰朱杲范琮黃瓛陳文璧高穀張堅沈暘
爲本院庶吉士同修書原習譯書王懋姚昇胡
清方勉林超曹義龔英時永彭麟應陳坤奇李
芳葉穎王士華吳紹生丁毅石玉黎民張遜萬
完周貴連智王諭樊敦王麟戴觀許彬徐景安

石慶鄭猷李冠祿周安謝暉照例改本院庶吉士仍習譯○五月起復學士兼左春坊大學士胡廣○九月擢行在翰林院庶吉士陳用劉永清陳璠黃壽生余學夔錢習禮爲檢討○九月五經四書大全及性理大全書成以藁進

上親製序于卷首計二百二十九卷賜纂修官學士兼左春坊大學士胡廣右庶子兼侍講楊榮右諭德兼侍講金幼孜修撰蕭時中陳循編修周述陳全林誌李貞陳景著檢討余學夔劉永清黃壽生陳璠陳用典籍黃約仲庶吉士涂順等

鈔幣有差仍賜宴于禮部

丙申

永樂十四年三月陞修撰兼右贊善梁潛爲侍讀

仍兼右贊善修撰王英王洪編修陳全爲侍講

○四月命學士兼左春坊大學士胡廣爲文淵

閣大學士右庶子兼侍講楊榮右諭德兼侍講

金幼孜俱爲翰林院學士三人俱仍兼春坊原

職復以翰林乏人命廣等及吏部各舉堪用者

數人以聞○陞檢討張伯穎爲修撰○八月擢

本院習字縣丞陳登秀才陳景茂黃卓俱爲中

書舍人○十月遣楊士奇迎候

有言林志 卷一 五十九 三百十五
車駕以祭酒胡儼署院事○十一月學士楊榮金幼
孜扈從還掌院事○十二月歷代名臣奏議書
成先是

上以壘書諭

皇太子令翰林院儒臣黃淮楊士奇等採古名臣
直言如張良對漢高鄧禹對光武諸葛對昭烈
及董賈劉向谷永陸贄奏疏之類彙錄以便觀
覽至是書成以進

上覽而嘉之賜名歷代名臣奏議命刊印以賜

皇太子

皇太孫及大臣○陞修撰沈度爲侍講學士中書
舍人沈粲爲修撰粲度之弟也

丁酉永樂十五年二月陞左諭德兼侍講楊士奇爲翰

林院學士仍兼諭德○三月車駕幸北京以大
學士胡廣學士楊榮金幼孜侍講學士沈度侍
講鄒緝曾祭王洪王直修撰余鼎羅汝敬蕭時
中沈粲編修周述檢討錢習禮余學夔黃壽生
劉永清陳璠博士王進典籍周翰黃約仲待詔
李遜庶吉士俞廷輔袁璞習譯庶吉士何賢等
二十八人扈從時侍從監國之臣獨學士楊士

奇在翰林

上以爲人少特留侍講梁潛副之○五月賜文淵閣

大學士兼左春坊大學士胡廣學士兼右庶子

楊榮學士兼右諭德金幼孜金織紗衣各一襲

○六月陞行在翰林院侍講曾棨爲侍講學士

此後凡稱行在翰林院者皆不赴本院任以其尚屬本院故係之

○以儒士郭

張善爲行在翰林院檢討張善自陳幼孤賴繼

母陳氏撫教而成願出任報效

上令翰林試其文可取故有是命○七月賜大學士

等官胡廣楊榮金幼孜二品金織襲衣等物○

八月

上命行在翰林院侍講兼左中允鄒緝侍講王洪爲
順天鄉試考試官已而改命行在翰林院侍講
王英代洪出洪爲禮部主事洪嘗密疏誣學士
胡廣言其父子琪爲延平知府以罪死廣不當
於實錄隱其罪

上察知子琪實卒于官遂不直洪至是北京行部奏
請鄉試考官

上命廣等擇可者廣等以緝洪對

上從之已受禮幣洪復密疏子祺事

上曰此小人豈可以在近侍命禮部追取禮幣而改命英出洪爲主事○

皇太子命侍講兼贊善梁潛侍講陳全爲應天鄉試主考官○九月賜大學士等官胡廣楊榮金幼孜白金各五十兩綵幣四表裏帛布各十疋○陞修撰沈粲爲侍讀○十月陞典籍鄭叔美爲檢討○學士楊士奇患病

皇太子命侍讀梁潛攝院事○時檢討陳用丁憂詔令奪情視事

戊永樂十六年二月命行在翰林院侍讀學士曾棨

侍講王英爲會試主考官○署院事梁潛言學士楊士奇病愈宜以印信歸之

皇太子曰士奇疾未全愈祇令直房辦事院事爾仍理之至五月士奇復掌院事○三月擢第一

甲進士李騏爲行在翰林院修撰劉江鄧珍俱爲編修第二甲第三甲周叙董璘楊珙褚思敬尹鳳岐陳詢徐律習嘉言王賓胡文善周懋昭王暹雷遂莫珪孔友諒爲庶吉士辦事行在翰林院又以進士中原習譯書秦初陳善陳紀朱孟得甄讓劉勉吳恭寇厚高舉楊盛劉源莊約

楊復潘恕沈讓段莓張震程虎林得爲行在翰林院庶吉士黃閏曾泉袁才輔晏鐸盧璟姚華木訥續旻謝涇許鵬李敬張志王圭成敬沈善馬良爲本院庶吉士俱仍習譯○五月重修

太祖高皇帝實錄成監修官行在戶部尚書夏原吉總裁官行在翰林院學士兼右庶子楊榮等表進

上具皮弁服御奉天殿受之閱良久嘉獎再四曰庶幾少副朕心又顧原吉等曰此本留朕所以資朝夕覽閱仍別錄一本藏古今通集庫○以實

錄成賜總裁官文淵閣大學士兼左春坊大學士胡廣學士兼右庶子楊榮國子監祭酒兼侍講胡儼人鈔百六十錠彩幣二表裏紗衣一襲纂修官學士兼右諭德金幼孜賞同胡廣等侍讀學士曾棨侍講鄒緝王英修撰余鼎羅汝敬主事李時勉陳敬宗人鈔百錠綵幣一表裏紗衣一襲復賜宴於禮部書成廣以病不及躬進命中官卽其家賜之○端午節賜文武群臣宴及節鈔有差加賜學士楊榮金幼孜二品金織衣各一襲○文淵閣大學士兼左春坊大學士

胡廣卒○擢行在翰林院習譯庶吉士何賢蔣

禮趙勗陳坤奇曹義鍾英爲本院編修戴覲王

璜王觀潘勤邵暹樊敷石慶黎民爲中書舍人

此習譯庶吉士授官之始○以行在刑部主事李時勉爲行

在翰林院侍讀陳敬宗爲侍講○詔纂脩天下

郡縣志書命行在戶部尚書夏原吉翰林院學

士兼右庶子楊榮翰林院學士兼右諭德金幼

孜總之○陛行在翰林院編修周述爲侍讀○

七月習譯庶吉士張觀前坐事輸作報恩寺至

是一年餘矣工部以請命宥之○逮侍讀兼右

贊善梁潛至行在殺之初有陳千戶者擅取民財事覺

皇太子命謫交趾已念其軍功貸之名還有言於上曰上所謫罪人

皇太子曲宥之矣遂殺陳千戶事連潛及司諫周冕旣逮至

上親問之潛等具實對

上顧學士楊榮等曰事固無預潛他日又諭尚書呂震曰事亦豈得由潛然猶未悉陳千戶非出

上謫之也兩人者皆未釋有毀冕者數言佻薄放恣

不可用遂併潛皆死時九月也

巳亥永樂十七年三月

上命侍講陳敬宗羅汝敬等至南京取文淵閣儲書

以北

皇太子遣修撰陳循馬鐸編修林誌陳景著及庶

吉士十四人齎送之○五月陞行在翰林院典

籍周翰為檢討○六月陞行在翰林院修撰王

直為侍講○九月以桂宗儒為行在翰林院修

撰○十月以胡種為行在翰林院檢討種大學

士廣之子也以舊恩錄用之俾於本院進學

庚子永樂十八年八月命行在翰林院侍講鄒緝王英
爲順天鄉試主考官○

皇太子命修撰張伯穎右贊善兼編修陳仲完爲
應天鄉試主考官○十月學士兼左諭德楊士
奇侍

皇太子如行在以侍講陳全修撰張伯穎同署院
事○以教授林長懋藺從善訓導徐永達爲行
在翰林院編修授

皇太孫經○十二月陞行在翰林院修撰羅汝敬
爲侍講○

上定都北京改本院曰南京翰林院頒新印北京翰
林院去行在二字以明年正月爲始○本院以
管理印信清理武黃注銷精微掌管書籍等務
留侍講陳全修撰張伯穎苗衷編修周孟簡李
貞王鈺檢討陳用典籍高廷禮凡八員其餘悉
詣北京

舊京詞林志卷一